

Na osnovu člana 9. Zakona o gradu Tuzla („Službene novine Federacije Bosne i Hercegovine“, 80/14) i u skladu sa Odlukom o proglašenju Grada Tuzle („Službeni glasnik Općine Tuzla“, broj 01/07) Gradsko vijeće Tuzle na sjednici održanoj dana, 31. 03. 2015. godine, d o n o s i:

ODLUKU

o izmjeni Statutarne odluke o organizaciji Grada Tuzle u skladu sa Zakonom o Gradu Tuzla

Član 1.

U članu 25, stav 1. Statutarne odluke o organizaciji Grada Tuzle u skladu sa Zakonom o Gradu Tuzla („Službenik glasnik Grada Tuzla“, broj 1/2014) (u daljem tekstu: Odluka), riječi “pet mjeseci” zamjenjuju se riječima “osam mjeseci”.

Član 2.

Ova odluka stupa na snagu narednog dana od dana objavljivanja u “Službenom glasniku Grada Tuzla”.

**Bosna I Hercegovina
Federacija Bosne I Hercegovine
Tuzlanski kanton
GRAD TUZLA
GRADSKO VIJEĆE**

Broj:01-05-1386-2015
Tuzla, 31. 03. 2015. godine

PREDSJEDAVAJUĆI

Jozo Nišandžić, prof.

Obrazloženje

Pravni osnov za donošenje ove Odluke

Pravni osnov za donošenje ove Odluke je član 9. Zakona o gradu Tuzla („Službene novine Federacije Bosne i Hercegovine“, 80/14), kojim je propisano slijedeće /citiramo/:

„Član 9“.

Privremena statutarna odluka

Vijećnici izabrani na općinskim izborima za Općinu Tuzla održanim 2012. godine donijet će Privremenu statutarnu odluku Grada Tuzle u roku od dva mjeseca od dana stupanja na snagu ovog zakona, koja će važiti do donošenja Statuta Grada./završen citat/.

Razlozi za donošenje Odluke

Gradsko vijeće Tuzla je na svojoj konstituirajućoj sjednici održanoj dana 30.10.2014. godine usvojilo Statutarne odluke o organizaciji Grada Tuzle u skladu sa Zakonom o Gradu Tuzla („Službenik glasnik Grada Tuzla“, broj 1/2014).

Odredbom člana 25. Citirane Odluke, određeno je slijedeće /citiramo/:

„Najkasnije u roku od pet mjeseci od dana stupanja na snagu ove Odluke, Gradsko vijeće će donijeti Statut Grada.

Do donošenja Statuta Grada primjenjivat će se odredbe Statuta općine Tuzla („Sl. glasnik općine Tuzla“, broj 2/99, 9/00, 2/08 i 12/09), koje nisu u suprotnosti sa Zakonom o uspostavljanju Grada Tuzle („Službene novine Federacije Bosne i Hercegovine“, broj 80/14), Zakonom o principima lokalne samouprave u Federaciji Bosne i Hercegovine („Sl. novine Federacije BiH“, broj 49/06) (u daljem tekstu: Zakon o principima lokalne samouprave) i odredbama ove Odluke“.

Nakon usvajanja Statutarne Odluke, Komisija za statutarna pitanja i propise, odmah je krenula u izradu nacrt Statuta Grada Tuzla. Nacrt Statuta Grada Tuzla je usvojen na petoj redovnoj sjednici Gradskog vijeća Grada Tuzla održanoj dana 14.1.2015. godine, kojom prilikom su usvojeni slijedeći zaključci:

- 1)** Nacrt Statuta Grada Tuzle upućuje se na javnu raspravu, koja će trajati 45 (četrdeset pet) dana.
 - 2)** Za provođenje javne rasprave zadužuje se Komisija za statutarna pitanja i propise.
 - 3)** Radi provođenja efikasne javne rasprave, na web stranici Grada Tuzle će biti postavljen nacrt Statuta Grada Tuzle, stenogram sa sjednice od 07.07.2013. godine, kao i izvod iz stenograma sa ove pete redovne sjednice Gradskog vijeća Grada Tuzla od 14.01.2014. godine sa istaknutim pitanjima vijećnika, s tim da će se tražiti od učesnika javne rasprave, da se obavezno izjasne o iznesenim pitanjima.
 - 4)** Javnu raspravu sa zainteresiranim građanima u mjesnim zajednicama organizirat će Odjeljenje mjesnih zajednica pri Službi za komunalne poslove, izgradnju i pitanja mjesnih zajednica, a s tim da će se posebno provesti rasprava sa civilnim sektorom. O javnoj raspravi, putem plakata i na drugi način, građani će biti adekvatno obaviješteni.
 - 5)** Kolegij Gradskog vijeća Tuzla i Komisija za statutarna pitanja i propise će razmotriti konkretne primjedbe, date od strane vijećnika i usaglasiti stavove prije utvrđivanja i upućivanja konačnog teksta prijedloga Statuta Grada Tuzle na razmatranje i usvajanje Gradskom vijeću Grada Tuzle.
- Nakon što je na teritoriji grada Tuzla, provedena javna rasprava pristiglo je 237 prijedloga na ukupno 59 odredaba (članova) nacrt Statuta Grada Tuzle. Primjedbe i dugestije dali su dali građani pojedinci, organi mjesnih zajednica, vijećnici, komisije, parlamentarni i neparlamentarni politički subjekti. Primjedbe i sugestije su date na preko 30 stranica. Za ozbiljan dokument kakav je Statut grada Tuzle, neophodno je da Komisija za statutarna pitanja i propise izanalizira sve primjedbe i sugestije, te da sačini Izvještaj sa javne rasprave i utvrdi prijedlog Statuta Grada Tuzla, koji će kao takav ići na usaglašavanje sa Klubovima vijećnika i vijećnicima, koji participiraju u Gradskom vijeću Grada Tuzle.
- Iz navedenih razloga produžava se rok za njegovo donošenje iz najkasnije u “roku od pet mjeseci” u “najkasnije u roku od osam mjeseci”. Raniji rok je nerealno postavljen, pogotovo ako se imaju u vidu zaključci Gradskog vijeća sa pete redovne sjednice.